



МОНГОЛ УЛСЫН  
ЭРҮҮЛ МЭНДИЙН САЙДЫН  
ТУШААЛ

2018 оны 05 сарын 24 өдөр

Дугаар A/206

Улаанбаатар хот

Г Журам шинэчлэн батлах тухай Г

Монгол Улсын Засгийн газрын тухай хуулийн 24 дүгээр зүйлийн 2, Эрүүл мэндийн тухай хуулийн 8 дугаар зүйлийн 8.2, 8.3 дахь заалт, Засгийн газрын 2011 оны 226 дугаар тогтоолыг тус тус үндэслэн ТУШААХ нь:

- “Гадаад оронд зайлшгүй шаардлагаар эмчлүүлэх иргэдэд санхүүгийн дэмжлэг үзүүлэх асуудлаар санал гаргах орон тооны бус зөвлөлийн ажиллах журам”-ыг хавсралтаар баталсугай.
- Монгол Улсад эмчлэх боломжгүй өвчин, эмгэгийн улмаас гадаад улсад зайлшгүй шаардлагаар эмчилгээ хийлгэх иргэдэд дүгнэлт гаргах орон тооны бус комиссыг тушаалаар баталгаажуулан байгуулж, удирдлагаар хангаж, хяналт тавьж ажиллахыг төрөлжсөн мэргэшлийн эмнэлгийн дарга, захирал нарт үүрэг болгосугай.
- Тушаалын хэрэгжилтэд хяналт тавьж ажиллахыг Төрийн нарийн бичгийн дарга (Э.Содномжамц)-д даалгасугай.
- Тушаал шинэчлэн батлагдсантай холбогдуулан Эрүүл мэндийн сайдын 2017 оны “Жагсаалт, журам шинэчлэн батлах тухай” А/370 дугаар тушаалын 2 дугаар заалт, 3 дугаар хавсралтыг тус тус хүчингүй болгосонд тооцсугай.



080968

Эрүүл мэндийн сайдын  
2018 оны 05 сарын 24 өдрийн  
1/206 дугаар тушаалын хавсралт

ГАДААД ОРОНД ЗАЙЛШГҮЙ ШААРДЛАГААР ЭМЧЛҮҮЛЭХ ИРГЭДЭД  
САНХҮҮГИЙН ДЭМЖЛЭГ ҮЗҮҮЛЭХ АСУУДЛААР САНАЛ ГАРГАХ  
ОРОН ТООНЫ БУС ЗӨВЛӨЛИЙН АЖИЛЛАХ ЖУРАМ

**Нэг. Нийтлэг үндэслэл**

1.1. Энэ журам нь Эрүүл мэндийн сайдын дэргэдэх гадаад улсад зайлшгүй шаардлагаар эмчлүүлсэн Монгол улсын иргэдэд санхүүгийн дэмжлэг үзүүлэх асуудлаар санал гаргах үүрэг бүхий орон тооны бус зөвлөлийн (цаашид "Зөвлөл" гэх) үйл ажиллагаатай холбоотой харилцааг зохицуулахад оршино.

1.2. Зөвлөлийн ажлын зохион байгуулалтын үндсэн хэлбэр нь хурал байна. Зөвлөлийн хурлыг гишүүдийн 75 хувиас дээш ирцийг бурдүүлсэн тохиолдолд хүчинтэйд тооцох ба зөвлөлийн гишүүд хүндэтгэн үзэх шалтгааны улмаас хуралд ирэх боломжгүй тохиолдолд тухайн гишүүний ажил, үүргийг орлон гүйцэтгэж байгаа албан тушаалтан хуралд оролцно.

1.3. Зөвлөл нь магадлан итгэмжлэгдсэн төв эмнэлэг, тусгай мэргэжлийн төвийн гадаад эмчилгээний комиссын дүгнэлттэй, Засгийн газрын тогтоолоор батлагдсан "Санхүүжилт олгох журам"-ын дагуу шаардлага хангасан материалыг өрхийн эмчийн тодорхойлолтын хамт бурдүүлж ирүүлсэн иргэнд санхүүгийн дэмжлэг үзүүлэх асуудлыг зөвлөлдөн нийт гишүүдийн олонхийн саналаар шийдвэрлэнэ.

1.4. Зөвлөл нь 2 сар тутамд 1 удаа хуралдана. Шаардлагатай үед зөвлөлийн даргын шийдвэрээр хурлыг зарлан хуралдуулж болно. Хурлыг зөвлөлийн дарга, түүний эзгүйд болон зөвшөөрлөөр дэд дарга даргалж болно.

1.5. Зөвлөл нь хуралдааны талаар хурлын тэмдэглэл хөтөлж, олонхийн саналаар шийдвэрлэсэн асуудлыг Эрүүл мэндийн сайдад танилцуулж, шийдвэр гаргуулна. Тэмдэглэлийг гадаад эмчилгээний урсгал хариуцсан нарийн бичгийн дарга хөтөлж, зөвлөлийн дарга, дэд дарга нар хянаж гарын үсэг зурж баталгаажуулна.

1.6. Гадаад улсад зайлшгүй шаардлагаар эмчлүүлэх өвчний жагсаалт, зөвлөлийн ажиллах журам, санхүүгийн дэмжлэг хүсэхэд бурдүүлэх материал болон бусад тайлбар мэдээллийг Эрүүл мэндийн яамны веб хуудсанд ил байршуулна.

**Хоёр. Зөвлөлийн үүрэг**

2.1. Зөвлөлийн бүрэлдэхүүн нь хууль дээдлэх, шударга ёс, хариуцлага хүлээх зарчмын хүрээнд хуралдаанаар хэлэлцэгдэх асуудлыг зөвлөлдөн, хууль тогтоомжид нийцсэн нэгдсэн шийдвэр санал гаргаж, Эрүүл мэндийн сайдад дэмжлэг үзүүлнэ;

2.2. Зөвлөлийн бүрэлдэхүүн нь төрийн албан хаагчийн болон эмчийн ёс зүйн хэм хэмжээг сахиж, хүлээсэн үүрэгтээ үнэнч байж, нийтийн ашиг сонирхолд захирагдан ашиг сонирхлын зөрчилд автахгүйгээр хурлаар хэлэлцүүлж байгаа дэмжлэг хүссэн иргэн бүрээр нарийвчлан хэлэлцэн шийдвэрлэн;

- 2.3. Зөвлөлийн дарга нь гадаад эмчилгээний зардлын зарцуулалтын тайланг хагас жил тутам Эрүүл мэндийн сайдын зөвлөлд танилцуулна;
- 2.4. Зөвлөлийн гадаад эмчилгээний урсгал хариуцсан нарийн бичиг:
  - 2.4.1. "Гадаад улсад зайлшгүй шаардлагаар эмчлүүлэх өвчний жагсаалт"-д ороогүй өвчин, эмгэгтэй иргэн гадаад улсад эмчилгээний зардал хүссэн тохиолдолд уг иргэнд холбогдох хууль журмын дагуу хариуг өгнө;
  - 2.4.2. Гадаад эмчилгээний зардалд санхүүгийн дэмжлэг хүсэж, санхүүжилт олгох журамд заасан материалыг бүрдүүлж ирүүлсэн иргэний материалын хуудасны тоо, бүрдэл хэсгийн тэмдэглэл бүхий жагсаалтыг санхүүжилтийн тооцоолол хариуцсан нарийн бичигт хүлээлгэн өгнө;
  - 2.4.3. Зөвлөлийн бүрэлдэхүүнд хурлын зар болон хурлаар хэлэлцүүлэх иргэдийн нэгдсэн мэдээллийг тараана;
  - 2.4.4. Гадаад улсад зайлшгүй шаардлагаар эмчлүүлж байгаа өвчлөл, эмчилгээнд хамрагдсан иргэдийн мэдээлэл болон эрүүл мэндийн байгууллагуудаас гаргасан эх орондоо эмчилдэг болоход чиглэсэн судалгаа, санал санаачлагыг дэмжин Эрүүл мэндийн яамны удирдлага, холбогдох газар, хэлтэст уламжлах, мэдээллээр хангана.
- 2.5. Гадаад эмчилгээний санхүүжилтийн тооцоолол хариуцсан нарийн бичиг:
  - 2.5.1. Зайлшгүй шаардлагаар гадаад улсад эмчлүүлсэн иргэний эмчилгээний төлбөр төлсөн баримтад үндэслэн тооцоог гаргах ба сүүлийн гүйлгээний өдрийн Монгол банкны гадаад валютын албан ханшаар төгрөгт хөврүүлэн эмчилгээнд зарцуулсан нийт зардлын 5 хувийг үндэсний мөнгөн тэмдэгтээр тооцон, Эрүүл мэндийн яамны Эдийн засаг санхүүгийн хэлтсийн даргаар хянуулж, зөвлөлийн хуралд танилцуулна;
  - 2.5.2. Зөвлөлийн хурлын шийдвэрийн дагуу иргэдэд мөнгийг шилжүүлэх бэлтгэл ажлыг ханган холбогдох журмын дагуу шуурхай шийдвэрлүүлнэ;
  - 2.5.3. Зөвлөлийн хурлаар хэлэлцүүлсэн иргэдийн материалыг архивын нэгж бүрдүүлж, холбогдох албан тушаалтанд хүлээлгэн өгнө;
  - 2.5.4. Зөвлөлийн даргад гадаад эмчилгээний санхүүжилтийн талаар, санал гаргах, мэдээллээр хангана.

#### **Гурав. Зөвлөлийн бүрэлдэхүүний эрх**

- 3.1. Байгалийн давагдашгүй хүчин зүйлээс шалтгаалан эмнэлгийн яаралтай тусламж, үйлчилгээ авах шаардлагаар гадаад улсад эмчилгээнд хамрагдсан иргэний дэмжлэг хүссэн хүсэлтийг хурлаар хэлэлцэн тухайн нөхцөл байдлыг тодруулан санхүүгийн дэмжлэг үзүүлэх асуудлыг шийдвэрлэх;
- 3.2. Шаардлагатай тохиолдолд иргэний гадаад улсад хийгдсэн оношилгоо, эмчилгээний талаар тодруулга материалыг иргэнээс гаргуулах;

#### **Дөрөв. Бусад**

- 4.1. "Гадаад улсад зайлшгүй шаардлагаар эмчлүүлэх өвчний жагсаалт"-д ороогүй өвчин, эмгэгтэй иргэнд гадаад эмчилгээний зардалд санхүүгийн дэмжлэг олгох асуудлаар эрх бүхий албан тушаалтан шийдвэр гаргах, зөвлөлийн бүрэлдэхүүнд үүрэг өгөхийг хориглоно.